



PREZIDÉNSIA
KONSELLU
MINISTRUS
VIII GOVERNUN KONSTITUSIONÁL



Gabinete
Porta-Voz

KOMUNIKADU IMPRENSA

Sorumutuk Konsellu Ministrus nian iha loron-24 fulan juñu tinan 2020

Konsellu Ministrus hala'o sorumutuk iha Palásiu Governu, iha Dili no aprova projetu Dekretu-Lei kona-ba alterasaun dahuluk ba Dekretu-Lei n.º. 16/2020 loron-30 fulan abril nian, kona-ba medida hodi fó apoiu ba empregu iha ámbitu pandemia KOVID-19. Tan haree katak situasaun sai di'ak liután loron ba loron, iha planu sanitáriu no epidemolójiku, nomós iha planu ekonómika, ne'ebé neinek-neinek sei la'o normal filafali tanba ne'e, konsidera katak la justifika ona atu fó nafatin apoiu temporáriu hafoin fulan juñu, ne'ebé kria hosi Dekretu-Lei n.º. 16/2020, loron-30 fulan abril nian. Nune'e, ho alterasaun ida-ne'e, apoiu hirak-ne'e sei aplika ba kontratu servisu hirak ne'ebé suspende hela ka reduz tiha períudu normal servisu iha fulan marsu, abril, maiu no juñu tinan 2020, nune'e mós kontribuisaun sira referente ba fulan hirak-ne'e rasik.

Ministru Transporte no Komunikasaun, José Agostinho da Silva, halo apresentasaun ida kona-ba projetu Dekretu-Lei, ne'ebé Konsellu Ministru aprova ho alterasaun kona-ba rejistu nasionál ba ró-ahi no embarkasaun sira. Diploma ida-ne'e hakarak atu regula rejistu ba ró-ahi iha Timor-Leste. Ho Dekretu-Lei ida-ne'e, ró-ahi no embarkasaun nasionál sira seluk tenke halo rejistu ba propriedade atu bele dada-sa'e bandeira Timor nian, nuudar indikasaun ba ninia nasionalidade no, halai iha tasi haktuir jurisdisaun Timor-Leste nian. Rejistu ba ró-ahi no embarkasaun sira ho objetivu analiza priense ka lae rekizitu téknika sira no kondisaun seguransa ne'ebé importante bainhira atu halai iha tasi no oinsá fó protesau ba ambiente iha tasi-laran, hodi hanoin mós ba nia tipolojia.



Palácio do Governo,
Avenida Presidente Nicolau Lobato,
Dili, Timor-Leste



PREZIDÉNSIA
KONSELLU
MINISTRUS
VIII GOVERNUN KONSTITUSIONÁL



Gabinete
Porta-Voz

Konsellu Ministru aprova mós projetu Rezolusaun Governu, ne'ebé apresenta mós hosi Ministru Transporte no Komunikaun, hodi aprova Polítika no Programa ba Transporte sira. Hodi kaer ba objetivu hirak ne'ebé defini ona iha Planu Estratéjiku Dezenvolvimentu 2011-2030 nian no ho Objetivu Dezenvolvimentu Estratéjiku Governu nian, Polítika ba setór transporte nia objetivu maka hadi'ak liután kapasidade, abilidade no afektasaun ba rekursu sira, hadi'ak liután kuadru legál sira hodi bele hatán ba nesesidade hosi sistema transporte ida ne'ebé modernu, fasilita no apoia hodi halo operasaun ida eficiente atu reforsa no hakbiit dezenvolvimentu sósiu-ekonómiku no hadi'ak liután regulamentu operasionál no ba jestaun ba sistema transporte sira.

Konsellu Ministru aprova tiha projetu Dekretu-Lei, ne'ebé apresenta hosi Ministru Interiór en ezersísiu, Filomeno da paixão de Jesus, kona-ba Regulamentu Disiplinár ba Polísia Nasionál Timor-Leste (PNTL). Projetu Dekretu-Lei ida-ne'e hakarak atu halo revizaun ba atuál Regulamentu Disiplinár PNTL nian, ne'ebé aprova ona iha tinan 2004 no seidak atualizadu haree ba nesesidade instituisaun ne'e nian no saída de'it maka nuudar objetivu dezenvolvimentu no profisionalizaun PNTL nian. Regulamentu foun ida-ne'e hakarak atu tada ba PNTL regra estruturadu lubuk ida hodi garante disciplina institusionál no profissional, hodi haroman loloos objetivu legál hosi polísia moderna, ne'ebé kria hodi defende sidadaun sira no hodi bele hatuur disciplina ba relasaun fundamentál ba sosiedade nia moris.

Ezekutivu aprova tiha mós projetu deliberaun hodi atribui ba Embaisadór Timor-Leste nian iha Pekin, hodi halo assinatura ba akordu ho Repúblika Populár China, atu fornese assisténsia militar gratuita mai Timor-Leste.

Konsellu Ministru aprova abertura ba prosesu aprovizionamentu ba kontratu akizisaun kombustível ba sentrá elétrika Hera no Betano, ne'ebé propoin hosi Ministru Obras Públika, Salvador Soares dos Reis Pires. Prosesu aprovizionamentu ida-ne'e ho objetivu halo



Palácio do Governo,
Avenida Presidente Nicolau Lobato,
Dili, Timor-Leste



PREZIDÉNSIA
KONSELLU
MINISTRUS
VIII GOVERNUN KONSTITUSIONÁL



Gabinete
Porta-Voz

akizisaun ba kombustível hodi halo produsaun ba energia elétrika ba períudu tinan tolu nia laran, entre dezenbru tinan 2020 no dezenbru tinan 2023 no ba kontratu ne'e, halo tiha estimativa katak presiza 428.169. 843 litru ba kombustível.

Konsellu Ministru aprova projetu hosi Proposta Lei, ne'ebé apresenta hosi Ministru Prezidénsia Konsellu Ministru, Fidelis Manuel Leite Magalhães, hodi halo alterasaun dahuluk ba Lei n.º 11/2017, lora-24 fulan maiu nian, Lei Migrasaun no azilu. Alterasaun ida-ne'e ho objetivu autoriza Governu, liuhosi Rezolusaun, fó orden hodi taka temporáriu postu fronteira sira bainhira haree hetan pandemia ida ka emerjénsia saúde iha âmbito internasionál, tuir termu Regulamentu Sanitáriu Internasionál, ne'ebé aprovado ona hosi Organizasaun Mundiál Saúde. Ho diploma ida-ne'e, Governu bele mós, liuhosi Rezolusaun Governu, bandu temporariamente ema estranjeiru, mak mai hosi nasaun ka nasaun sira ne'ebé ema ne'e liu hodi halo tránzitu, iha surtu hosi moras, haree ba moras ne'e ninia grau transmissibilidade, bele mós haree ba infeksaun ka kontaminasaun, hodi lori tama mai território nasionál, hamosu risku ba saúde pública.

Konsellu Ministru aprova Projetu hosi Proposta lei, ne'ebé apresenta mós hosi Ministru Prezidénsia Konsellu Ministru, kona-ba alterasaun dahuluk ba Lei n.º 10/2004, lora-24 fulan novenbru nian, Lei Sistema Saúde. Ho alterasaun ida-ne'e, autoridade competente sira, iha matéria vijilánsia epidemolójiku no sanitáriu, uza mekanizmu protesau ba saúde pública, ho objetivu atu evita no neutraliza risku atu moras ne'e bele kaer-daet no kona ba populusaun. Entre medida protesau ba saúde pública ne'ebé inklui iha diploma ida-ne'e, sei hatama mós possibilidade atu ema sé de'it tenka halo ezame médiku no, bainhira deskonfia moras ruma ne'ebé inklui mós iha lista ne'ebé preveé ona iha lei ka regulamentu administrativo, hodi lori ba internamentu ka tratamentu kompulsivu, ba izolamentu no kuarantena. Iha situasaun ne'ebé aatliu ka grave emerjénsia ba saúde, bele mós fó orden atu halo konfinamentu obrigatóriu.



Palácio do Governo,
Avenida Presidente Nicolau Lobato,
Dili, Timor-Leste



PREZIDÉNSIA
KONSELLU
MINISTRUS
VIII GOVERNUN KONSTITUSIONÁL



Gabinete
Porta-Voz

Ikusliu, Sekretaria Estadu ba Igualdade no Inkluzan, Maria José da Fonseca Monteiro de Jesus, halo tiha apresentasaun ba Konsellu Ministru kona-ba relatóriu anuál tinan 2019, hosi planu asaun nasional kontra violénsia bazeia ba jéneru. Planu ida-ne'e hamriik iha pilár haat maka hanesan, prevensaun violénsia bazei aba jéneru, prestasaun servisu esensial ba vítima violénsia, asesu ba justisa no koordensaun, monitorizasaun no avaliaun no apresenta rekomendasaun asaun prinsipál sira ne'ebé atu implementa haktuir pilár ida-idak, hahú hosi halo sensibilizasaun ba populasaun no ba instituisaun sira kona-ba kestaun ba jéneru, hadi'ak liután vítima sira nia asesu ba saúde no abrigo, hadi'ak setór judisiáriu no enkuadramentu legál hodi fó protesasaun ba vítima sira no hadi'ak koordensaun institusionál. **Remata**



Palácio do Governo,
Avenida Presidente Nicolau Lobato,
Dili, Timor-Leste